

12 JUN 2000

Mahathir-Ling

DR LING LAKSANA TUGAS DENGAN CUKUP BAIK, KATA DR MAHATHIR

Oleh: Mohd Ghazemy Mahmud

TOKYO, 12 Jun (Bernama) -- Datuk Seri Dr Mahathir Mohamad berkata Menteri Pengangkutan Datuk Seri Dr Ling Liong Sik melaksanakan tugasnya dengan cukup baik terutama dalam pembangunan pelabuhan negara.

"Beliau datang jumpa saya sebelum saya ke sini. Dia terima nasihat saya supaya tidak letak jawatan kerana saya berpendapat bahawa kerja yang dibuat oleh beliau adalah sesuatu yang baik," katanya pada persidangan berita di sini pada akhir lawatan kerja seminggu ke Jepun.

Perdana Menteri berkata demikian semasa ditanya mengenai keputusan Dr Ling untuk menarik balik hasratnya meletakkan jawatan kabinet itu.

Dr Mahathir berkata Malaysia mencapai banyak kemajuan terutama dalam bidang pelabuhan sepanjang Dr Ling menjadi menteri.

"Ada ketikanya prestasi pelabuhan-pelabuhan negara adalah "sangat tidak memuaskan" kerana semua pelabuhan mengendalikan kurang daripada satu juta kontena setahun dan ia hanya menjadi pelabuhan singgah yang mengendalikan barangan untuk Singapura.

"Kita belanja banyak wang buat pelabuhan tapi tak digunakan. Sekarang ini kita tak lagi jadi pelabuhan singgah dan kita telah meningkatkan pengendalian kontena," kata beliau.

Dr Mahathir berkata di Pelabuhan Klang sahaja, tiga pelabuhan -- Pelabuhan Utara, Klang Container Terminal dan Pelabuhan Barat - mengendalikan tiga juta kontena setahun tidak termasuk pelabuhan Pasir Gudang, Tanjung Pelepas dan Pulau Pinang.

"Malahan, Pelabuhan Kuantan sedang diperbesarkan bagi mengendalikan lebih banyak laluan kapal.

"Ini semua adalah hasil usaha Dr Ling. Kalau dia berhenti, saya terpaksa ambil orang baru yang mungkin tidak ada pengalaman," katanya.

Perdana Menteri berkata Dr Ling telah menjalinkan hubungan baik dengan para pemilik kapal dari seluruh dunia termasuk Eropah, Amerika Syarikat, Jepun, Korea, Taiwan dan Hong Kong.

"Mereka telah menjadi teman bermain golf beliau dan dalam perniagaan seperti ini, adalah penting untuk menjalinkan hubungan yang lebih peribadi dan Dr Ling telah melakukannya.

"Jadi, apa pun yang mungkin dikatakan orang tentang beliau, bagi pihak kerajaan, kita berasa gembira kerana beliau telah menarik balik peletakan jawatannya," kata Dr Mahathir.

Menjawab soalan wartawan mengenai pertemuan beliau dengan Dr Ling pada peringkat awalnya, Dr Mahathir berkata, "Dia ada masalah sikit. Sedikit masalah peribadi...semua orang buat tuduhan-tuduhan terhadapnya dan dia berasa kecewa."

"Tapi beliau mempunyai komitmen terhadap kerajaan. Sebab itu saya minta dia supaya jangan hantar surat peletakan jawatannya semasa berjumpa saya. Dan saya sendiri tidak mahu terima sebarang surat peletakan jawatan," kata beliau.

Selasa lepas, Dr Ling mengumumkan bahawa beliau akan terus memegang jawatan kabinet itu. Dr Ling yang juga Presiden MCA membuat keputusan itu selepas pulang daripada percutian 10 hari di Perth bagi menimbang semula hasratnya untuk meletakkan jawatan pada 22 Mei lepas.

-- BERNAMA

GM NAK